



Inatsisartunut ilaasortaq
Akitsinnguaq Olsen

**§ 37 imm. 1 naapertorlugu imminut pilersornerulernissaq pillugu
apeqquteqaammut nr. 181-mut akissuteqaat**

06. okt 2011
Sagsnr. 2011-056104
Dok. Nr. 734661

Naalakkersuisut 23. september 2011 § 37 imm. 1 naapertorlugu apeqquteqaammik, imminut pilersornerulernissamut tunngasumik ilinniit tigusaqarput. Apeqquteqaat akisussaaffeqarfinni akisassanngorlugu innersuunneqarsimavoq.

Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@nanoq.gl
www.nanoq.gl

Apeqqutigineqarput:

1. Sunik aalajangersimasunik inuussutissanik (råvarer) imminut pilersornerulernissamik siunnerfinnik angusaqarfiusunik Naalakkersuisut takussutissaqarpat?
2. Naalakkersuisunit nunaqarfiit qassit imminut naammattumik pilersorsinnaassuseqanngitsutut isigineqarpat, tamatumalu kingunerisaanik ataavartuuginnarsinnaanngitsutut isigineqartut qassiuppat nunaqarfiillu sorliit tamatumani pineqarpat?

1-mut)

Imminut pilersornerulernissaq anguniarlugu suliaq, Naalakkersuisooqatigiinnissamik Isumaqatigiissut 2009-meersoq innersuussutigalugu annerusumik paasisitsiniaanermik siunertamilu siammarterinermik imaqarpoq. Aalisarnermut, Piniarnermut Nunalerinermullu Naalakkersuisoqarfiup suliassaasa ilagaat ulluinnarni sulinermini siunertap tamatuma taputartuunnissaa.

2010-mi ukiaaneraniit Aalisarnermut, Piniarnermut Nunalerinermullu Naalakkersuisoqarfik aaqqissuussinernut, kalaallit nerisassaataannik atuinernulernissamik siunertaqartunut peqatasaasarsimavoq. Aaqqissuussinerit tamakkua sooq innuttaasut kalaallit nerisassaataannik ullumikkornit atuinernunnginnerannik pequtaasinnaasut ilaannik nassuiaatissarsiffiusarsimapput, tamatumalu kingunerisaanik siumut ingerlariaqqinnissamik tikkuussisuullutik.

Naapeqatigiittarnerit arlallit pineqartumut attuumassuteqarsinnaasut, soorlu Naalakkersuisoqarfiit suliamut attuumassutillit, Kalaallit Nunaanni Sulisitsisut (GA), Pilersuisoq, Kalaallit Nunaanni Brugseni, pilersuisunit aallartitat, KNAPK, piffinni ataasiakkaani KNAPP-it, KANUKOKA, kommunit kommuninilu paaqqinnittarfinni aallartitat allallumi peqatigalugit ingerlanneqartarsimapput.

Innuttaasunik ataatsimiititsinerni, KNAPP-it kommunillu aallartitaannik ataatsimeeqateqartarninni, inuussutissat pillugit isumasioqatigiinnerni 2009-mi, 2010-mi Narsamilu september 2011-mi Inuussutissat Pillugit Isumasioqatigiinnermi pinngortitami pisussuutitta atorluarneqarnerulernissaat, ilaatigut nerisassianik eqqussuinitta millisinniarneqarneratigut, pingaaruteqassusaa sunniiniutigisarsimavara.

Pisuussutitsinnik atorluaanerulernerup inuiaqatigiit imminnut nammassinnaanerulernissaannut ikiussavai, aningaasaqarnikkut pinngortitamilu pisuussutinik atuunitsinnut tunngatillugu.

Oqariartuut nuannaarutigeqisannik tigulluarneqarsimavoq, ingammillu Kommune Kujalleq-mi maluginiarsimavara immiut pilersornerulernissap kalaallilu tunisassiaannik atuinerulernissap ilisimaarilluarneqarnera, soorlu kommunip Nerisassat Pillugit Isumasioqatigiinnermi aqqissuussineranut paaqqinnittarfiillu kalaallit nerisassiaataannik atuinerulernissamik ilisimaarinnilluarnerat, minnerunngitsumillu 2012-mi nerisassat pillugit Festival-eqartitsinissap ersersippaat ilorraap tungaanut ingerlasugut.

Kisitsisitigut angusarisimasanik saqqummiussassaqaanngilanga, qularinngilarali ukiuni aggersuni pisuussutitsinnik atorluaanerulersimanissarput. Naalakkersuisunulli ilaasortanngoqqaarama oqariartuutigisarsimasakka, ukioq manna siornalu aatsaat malugivara sunniuteqariartuaalersimasut.

Nersortariaqakkagulli ukuupput kattuffiit, paaqqinnittarfiit isummersorfiillu namminneerlutik pisuussutitta atorluarneqarnerulernissaannik suliniuteqartut, politikikkummi oqariartuutit kisimik, qaammarsaanissamut naammanngimmata. Aalajangersimasunik suliniuteqartoqartariaqarpoq, tamakkulu pissapput assersuutigalugu pilersuisuni, paaqqinnittarfinilu, tamakkuami ineriartorneq sumut ingerlasoq nalunngilluarpaat.

Kalaallit Nunaata iluani kalaallit nerisassiaannik nioqquteqarnerup politikikkut sammineqarneratigut, pisiniarfiit neriniartarfiillu kalaallit tunisassiaannik nittarsaassinerulernerannik tunisaqarnerulernerannillu aamma kinguneqarsimavoq.

Kalaallit Nunaata iluani niuernerup qaffariarsimanera ilaatigut tunisassiorturnut soorlu Arctic Greenfood A/S-mut sunniuteqarsimavoq, tassani Kalaallit Nunaata iluani niuernermi kaaviiartitat qaffassimmata tunisassiallu tunisassiorfinni suliarineqartarneri suliassaqartitsinerulersimmammata.

Kalaallit nerisassiaannik ullumikkut atuinerunnginnermi pequtaagajuppoq, tamakkua akitigut inissisimani. Aallartitali arlallit tamanna akerlilertarpaat, oqarlutik nioqqutit pissarsiariuminaappallaarnerat ajornorsiuataanusooq. Pisartunimi arlalitsigut Naalakkersuisut sunneeqataaffigisinnaanngisaannik, nioqqutissat assartorneqarnerisigut niuernikkullu atugassarititaasunit akit sunnerneqartarmata. Nerisassiali nerrivimmuut aqquaat takivallaartartoq qularutissaanngilaq. Tamanna isumaqarpoq suleqatigiit imminnut oqaloqatigiinnerusariaqartut imminnullu ammanerullutik. Kiisalu piniartut amerlanerusut pisiniarfinnut toqqaannartumik tuniniaasinnaanissaminnut akuersissuteqartariaqartut, soorluttaaq taakkua aamma tigooraasuunissaminnut uumasup nakorsaanit akuersissuteqartariaqartut.

2-mut)

Nunaqarfiit ataasiakkaat imminnut pilersorsinnaassusaat, ataavartuuginnarsinnaassusaannut uuttuutitut atorneqassanngilaq.

Innuttaasunik ataatsimiititsisarnepassuit ingerlattareerlugit misilittakkallu tunngavigalugit isumaqarluinnarpunga, nunaqarfiit illoqarfiillu mikinerusut pinngortitami

pisuussutitsinnik atorluaasinnaanerusartut, ilaatigut ilaqutariit ukiornissaanut allani najugaqartuniit piliniallaqqinnerusarmata, ulluinnarnilu pisuussutitsinnik atorluaanianermi nerisassiat pinngoritamiit nerrivinnut aqquaat ajornannginnerusarmat.

Inussiarnersumik inuulluaqqusillunga
Med venlig hilsen

Ane Hansen